

आकाशवाणी जयपुर-अजमेर

दिनांक : 23.04.2026 समय : 18.45 बजे

समाचार

- मुख्यमंत्री भजनलाल शर्मा कह्यो-सरकार राज्य ने खेती-बाड़ी अर खाद्य प्रसंस्करण रा हलका मांय अगाड़ी बणावणो तैय कीनो।
- प्रदेश मांय गर्मी रो ज़ोर बध्यो-आवता तीन-चार दिन उतराद-आतूणी हलकां मांय लू बाजण री शंका।
- राज्य सरकार लू ऊं बचाव सारू जनता सारू एडवाइज़री जारी कीनी।

अर

- लद्दाख मांय भगवान बुद्ध रा पवित्र अवशेषां ने 15 दिन तांई जनता कानी ऊं दर्शन करण सारू रख्या जावेला।

000

जयपुर मांय 23 ऊं 25 मई तांई ग्लोबल राजस्थान एग्री-टेक मीट-'ग्राम-2026' राख्यी जावेला। मुख्यमंत्री भजनलाल शर्मा आज नई दिल्ली मांय 'ग्राम-2026' रा रोड-शो रा तैत राख्यी ज्या कार्यक्रम मांय आ जाणकारी दीनी। वे बतायो के बाजरा, सरसों, ग्वार अर जीरा सरीखी साखां री उपज लेवण मांय राजस्थान देश मांय अब्बल है। मुख्यमंत्री कह्यो के किसानां री आमदनी बधावण सारू आं साखां रा प्रसंस्करण अर वां रो मोल बधावण माथे जोर दियो जा रह्यो है। वे कह्यो के ई सारू प्रदेश मांय 39 फूड पार्क विकसित कर्या जा रह्या है अर बेगी ई नुवी 'कृषि अर खाद्य प्रसंस्करण नीति' लागू करी जावेला। श्री शर्मा कह्यो के राज्य रा चौबीस ज़िलां मांय किसानां ने दिन मांय बिजली मुहैया करावणो सारू कर दियो ज्यो है अर आवता साल तांई पूरा राज्य मांय ओ सुबीतो मिलण लागेला। मुख्यमंत्री 'गोपाल क्रेडिट कार्ड' योजना रो जिकर करता थकां कह्यो के ढांढा-ढोर राखण वाळां ने ई रे जरिए एक लाख रुपया तांई रो बिना ब्याज रो कर्ज दियो जावे है। मुख्यमंत्री निवेशकां अर जाणकारां ने न्यौतो देता थकां कह्यो के नुवी तकनीक ऊं प्रदेश रा किसान आबाद व्हेला।

-----

000

लोकसभा अध्यक्ष ओम बिरला कह्यो है के तालीम केवल ज्ञान हासिल करण रो जरियो नी बल्कि व्यक्तित्व विकास अर जीवन मूल्यां ने शामिल करण री लगातार प्रक्रिया है। वे आज नई दिल्ली मांय एक गैर-सरकारी स्कूल रा सालाना जळसा मांय बोल रह्या हा। बिरला कह्यो के बदलता ज़माना मांय नौजवानां सारू नवाचार, बुनियादी सोच अर प्रौद्योगिकी री दिशा मांय आगे बधबो जरूरी है।

-----

000

राज्य रा ऊगणी हलका मांय कटे-कटे लू बाज रही है। लारला चौबीस घंटा मांय श्रीगंगानगर, 43 दशमलव 7 डिग्री सेल्सियस अधिकतम तापमान सागे सब ऊं उन्नी ठौड़ रह्यो। पिलानी मांय 42 दशमलव 7, चित्तौड़गढ़ मांय 42 दशमलव 6, चूरू मांय 42 दशमलव 4 अर कोटा मांय 42 दशमलव 1 डिग्री सेल्सियस अधिकतम तापमान दर्ज करी ज्यो।

मौसम केन्द्र, जयपुर रा निदेशक राधेश्याम शर्मा बतायो के आवता पांच दिन मांय पारो एक-दो डिग्री सेल्सियस और चढ़बा रा आसार है।

ई बीचे राज्य सरकार लू ऊं बचाव सारु एडवाइजरी जारी कीनी है। आपदा प्रबंधन विभाग री उपशासन सचिव शैफाली कुशवाहा बतायो के लू रे दौरान जनता ने तावड़ा मांय जावण री सूरत मांय सूती कपड़ा पहरण, उगाड़ा माथा नी जावण अर ओआरएस, लस्सी अर नींबू पाणी सरीखी चीजां काम लेवणी चाहिजे। महकमो बच्चां, बुजुर्गां अर आस वाळी लुगाइयां रो खास ध्यान राखण री अरज कीनी है। ई सागे ई कमटाणा माथे छाया अर ठण्डा पाणी रो प्रबंध करण रा हुकम ई दिया ज्या है। पशुपालन अर डेयरी मंत्री जोराराम कुमावत ई प्रदेश मांय बधती गर्मी बीचे ढांढा-ढोर राखण वाळां ऊं जिनावरां री हिफाजत रो ध्यान राखण बाबत् कह्यो है। वे अहलकारां ने जिनावरां रा जरूरी पोषण अर स्वास्थ्य री देखभाल सारु सगळा जरूरी प्रबंध करण रा हुकम दीना। महकमा रा प्रमुख शासन सचिव विकास सीताराम जी भाले पशुआं ने गर्मी ऊं बचावण सारु अहलकारां ने जाग जगावण रा अभियान चलावण बाबत् कह्यो। वे जनता अर खुद सेवक संस्थावां ऊं जिनावरां सारु पाणी रा कुंड बणावण अर परिंन्दां सारु परिंन्डा लगावण री अरज कीनी।

000

लद्दाख मांय एक ऊं पंद्रह मई ताई भगवान बुद्ध रा पवित्र अवशेषां ने जनता कानी ऊं दर्शन करण सारु रख्या जावेला। केंद्रीय संस्कृति अर पर्यटन मंत्री गजेंद्र सिंह शेखावत आज नई दिल्ली मांय आ जाणकारी दीनी। वे बतायो के भारत मांय ओ पहलो मौको व्हेला, जद भगवान बुद्ध रा पवित्र अवशेष मूल भंडार ऊं बाहर ला र दर्शन सारु रख्या जावेला। 15 दिन रा ई कार्यक्रम रे दौरान अवशेषां रा दर्शन सागे ई शोभायात्रावां, ध्यान सत्र, योग शिविर अर अंतर्राष्ट्रीय स्तर रा सम्मेलन राख्या जावेला।

000

भारतीय जनता पार्टी रा राष्ट्रीय अध्यक्ष नितिन नबीन रो सत्ताइस अप्रैल ने प्रदेश रो दौरा करण रो कार्यक्रम है। भाजपा रा प्रदेश अध्यक्ष मदन राठौड़ आ जाणकारी दीनी। वे बतायो के पार्टी रा राष्ट्रीय अध्यक्ष बण्यां पाछे पहली दफा प्रदेश रा दौरा सारु आवण वाळा नबीन प्रदेश मांय पार्टी रा सात नुवा जिला दफतरां रो उद्घाटन करेला। ई मौके खास कार्यक्रम टोक मांय व्हेला, जठे वे भाजपा रा नुवा दफतर रो उद्घाटन करेला।

ई सागे ई वे छह और जिला दफतरां रो वर्चुअल तरीका ऊं उद्घाटन करेला अर जालौर मांय भाजपा रो दफतर बणावण रा काम री नींव रखेला।

000

हनुमानगढ़ जिला मांय टाबरियां ने कैंसर री बीमारी ऊं बचावण रा एचपीवी (ह्यूमन पैपिलोमा वायरस) टीका लगावण सारु काल खास अभियान चलायो जावेला। जिला प्रशासन अर स्वास्थ्य विभाग री ओर ऊं चलाया जावण वाळा ई अभियान रा तैत 14 ऊं 15 साल ताई री उम्र री टाबरियां ने मुफ्त टीका लगाया जावेला। इण ऊं पैली आज टिब्बी रा राजकीय महात्मा गांधी विद्यालय मांय ब्लॉक मुख्य चिकित्सा अधिकारी डॉक्टर रीतिका पारीक टाबरियां ने ई घातक वायरस ऊं बचाव अर टीका रा महत्त्व रा बारा मांय जाणकारी दीनी। वे जनता ऊं टाबरियां रे अ टीका जरूर लगवावण री अपील कीनी।

-----

000

प्रदेश मांय राष्ट्रीय पोषण पखवाड़ा रा तैत आज न्यारा-न्यारा कार्यक्रम राख्यी ज्या। डीग जिला मांय आस वाळी लुगाइयां अर बच्चां ने कुपोषण ऊं मुक्त राखण सारु आंगनबाड़ी केंद्रां माथे खास अभियान चलायी ज्यो।

वठे री पर्यवेक्षक अपर्णा पाराशर बतायो के बच्चां रा पूरा विकास सारु संतुलित खाण-पीण अर टेमसर टीका लगावणो जरूरी है। वे महिलावां ने खून री कमी ऊं बेहतर पोषण रे जरिए बचबा री राय दीनी।

-----

पाली जिला मांय ई आठवों पोषण पखवाड़ो पूरो व्हेवण रे मौके खास रंगोली रे जरिए साफ-सफाई अर संतुलित खाण-पीण रो संदेश दियो ज्यो।

000

सवाईमाधोपुर ज़िला मांय 'टीबी मुक्त भारत अभियान' रो दूजो दौर काल सुरू कर्यो जावेला। ई रा तैत गांवाई अर शहरी हलकां मांय मांदा लोगां री पिछाण कर र वां रो ईलाज करायो जावेला। अभियान ने जनता रो आंदोलन बणावण सारु काल राख्यी जावण वाळी ग्राम सभावां मांय टी.बी. री बीमारी ने जडु ऊं खत्म करण रा बारा मांय खास चर्चा करण सागे गांव वाळां ने 'निक्षय शपथ' दिरायी जावेला।

000

प्रदेश मांय सरकारी योजनावां रा तैत कामां अर स्कूलां मांय मिड-डे-मील री व्यवस्था रो जायजो लेवण सारु आज जांच रो अभियान चलायी ज्यो। भरतपुर रा ज़िला कलेक्टर कमर चौधरी बांसी अर महुआ मांय सरकारी स्कूलां री औचक जांच कीनी। वे मिड-डे-मील योजना रा तैत विद्यार्थियां ने खिलाया जावण वाळा खाणा री गुणवत्ता अर साफ़-सफ़ाई री जांच कीनी। ज़िला कलेक्टर शिक्षकां ने बच्चां री भणार्ई-लिखाई सागे वां रा पोषण माथे ई ध्यान देवण सारु कह्यो। वे टाबरियां री हिफ़ाजत सारु वां ने 'गुड टच-बेड टच' रा बारा मांय जाग जगावण सारु ई कह्यो। जैसलमेर रा फतेहगढ मांय उपखण्ड अधिकारी भारत गुर्जर स्कूलां रो दौरो कर र मध्याह्न भोजन अर पन्नाधाय बाल गोपाल योजना रा तैत काम रो जायजो लीनो। वे रसोई मांय साफ़-सफ़ाई अर खाण-पीण री चीजां रा रख-रखाव रो जायजो ई लीनो।

000